

## T. LVCRETI CARI

sed quia non vulgo paria omnibus omnia constant.  
sic aliis in rebus item communia multa 695  
multarum rerum cum sint primordia, verum  
dissimili tamen inter se consistere summa  
possunt; ut merito ex aliis constare feratur  
humanum genus et fruges arbustaque laeta.

Nec tamen omnimodis coniecti posse putandum est 700  
omnia. nam vulgo fieri portenta videres,  
semiferas hominum species existere et altos  
interdum ramos eigni corpore vivo,  
multaque coniecti terrestria membra marinis,  
tum flammam taetro spirantis ore Chimaeras 705  
pascere naturam per terras omniparentis.  
quorum nil fieri manifestum est, omnia quando  
seminibus certis certa genetrice creata  
conservare genus crescentia posse videmus.  
scilicet id certa fieri ratione necessust. 710

nam sua cuique cibis ex omnibus intus in artus  
corpora discedunt conexaque convenientis  
efficiunt motus. at contra aliena videmus  
reicere in terras naturam, multaque caecis  
corporibus fugiunt e corpore percita plagis, 715  
quae neque coniecti quoquam potuere neque intus  
vitalis motus consentire atque imitari.  
sed ne forte putes animalia sola teneri  
legibus hisce, eadem ratio res terminat omnis.  
nam veluti tota natura dissimiles sunt 720  
inter se genitae res quaeque, ita quamque necessest  
dissimili constare figura principiorum;  
non quo multa parum simili sint praedita forma,  
sed quia non vulgo paria omnibus omnia constant.